

**“PASAIKO PORTU-EREMUAN ARRAIN FRESKOAREN TXIKIZKARI – EROSLEAREN
JARDUERAN ARITZEKO BALDINTZA-ORRIAK”**

1. artikulua.- Lege-oinarria.

Baldintza Orri hauek, hain zuzen ere, Interes Orokorreko Portuen Araubide Ekonomikoari eta Zerbitzuak Emateari buruzko azaroaren 26ko 48/2003 Legea aldatzen duen abuztuaren 5eko 33/2010 Legearen 86. eta 87. artikuluetan xedaturikoa betez ezarri dira, betiere Euskadiko Autonomia Erkidegoari dagozkion eskumenen kontra joan gabe.

2. artikulua.- Aplikazio-eremua.

Baldintza-orri hauek Pasaiako lonjan handizkakoa ez den Arrain Freskoaren Eroslearen jardueran aritzean aplikatzekoak izango dira.

3. artikulua.- Arrain-eroslea.

Baldintza Orri hauen ondorioetarako, Arrain Freskoaren Erosletzat joko da behar bezala baimenduta dagoen pertsona fisikoa edo juridikoa, baldin eta Pasaiako lonjaren eremuan Arrain Freskoaren Handizkariaren Jardueran Aritzeko Baldintzen Orrietan definitutakoaren arabera handizkaria ez bada eta, horrez gain, arrantzako produktuak eskuratzen eta berriro saltzen profesionalki jarduten badu, bere izenean eta bere kontura, eta txikizkaria, sukaldaria edo eraldaketarako enpresa edo turismo-enpresa izan daiteke, besteak beste.

4. artikulua.- Arrain Freskoaren Erosleak dituen erantzukizun eta betebeharrak.

Arrain Freskoaren Erosleak behar bezala bete beharko ditu Euskal Autonomia Erkidegoko araudia, Baldintza Orri hauek eta, oro har, Portuko Zerbitzuen eta Poliziaren Araudi Orokorra eta, hala badagokio, baita hura garatuko duten xedapenak ere.

Arrain Freskoaren Eroslea izango da produktuen erantzule bakarra, horiek enkante publikoan eskuratu ondoren, eta halaber, horien geroko manipulazio, prestakuntza eta esportazioarena, erosketatik eta geroko salmentatik ondorioztatzen diren obligazio ekonomikoena eta pertsonen edo gauzei eragiten zaizkien kalte edo galerena, Pasaiako Portuko Agintaritzarenak izan edo hirugarrengoenak izan, baldin eta beren jarduera gauzatzean egindako jarduera, ez-egite edo arduragabekeriek eragiten badituzte.

5. artikulua.- Pasaiako Portuan jarduera honetan aritzeko baimena.

Baldintzen Orri honen xede den jardueran aritzeko, Pasaiako Portuko Agintaritzaren baimena eskuratu beharko da aurretiaz. Horretarako, dagokion eskabidea egingo zaio idatziz Pasaiako Portuko Agintaritzari eta, horrez gain, honako agiri hauek aurkeztu beharko dira:

- a) Ekonomia Jardueren gaineko Zergan alta eman izanaren frogagiria.
- b) Identifikazio Fiskalaren Zenbakiaren (IFZ) kopia eta, horrez gain, pertsona juridikoen kasuan, sozietatearen eraketa-eskrituraren kopia, haren estatutuak, ahalordeak eta Merkataritza Erregistroan inskribatu izanaren ziurtagiria.
- c) Horren ordezkaritza izango duten pertsonen izena eta NAN; behar bezala egiaztatu beharko da dagokion ahalduztze-agiriaren bidez.

- d) Helbidea, telefono-, telefax- edo telex-zenbakia, edo helbide elektronikoa.
- e) Erregistroan inskribatzeko eskaera egin ondoren gauzatutako aldaketa guztiak Portuko Agintaritzari jakinarazteko konpromisoa, baldin eta aldaketa horiek orain arte aipatutako atalei eragiten badiete.
- f) Pasaia Portuko Agintaritzak bere garaian eskatzen duen beste edozein.
- g) Baldintza Orri hauetako artikulua ezagutu eta onartzen dituela dioen berariazko adierazpena.

6. artikulua.- Baimendu eta inskribatzeko eskaeren ebazpena.

Portuko Agintaritzaren Administrazio Kontseiluari edo eskuordetzen duen pertsonari dagokio baimena ematea.

Baldintza Orri hauetan aipatzen diren jarduerak horretarako baimendutako pertsona fisiko edo juridikoei bakarrik gauzatu ahal izango dituzte Portuan. Baimen horiek sei urteko iraupena izango dute eta baliogabetu egin ahal izango dira Baldintza Orri hauetako 7. artikuluan aipatzen diren kasuetan.

Baimena eman ostean, baimendutako pertsona fisiko edo juridikoa Pasaia Portuko Agintaritzaren Arrain Freskoaren Erosleen Erregistroan inskribatuko da.

7. artikulua.- Baimena iraungitzea.

Portuan Arrain Freskoaren Eroslearen jardueran aritzeko baimena iraungita geratuko da honako kasu hauetan:

- a) Dagokion Autonomia Erkidegoko baimena iraungitzen denean.
- b) Norberak hala eskatzen duenean.
- c) Pasaia Portuko Agintaritzak baliogabetzen duenean. Heriotza, ezgaitasuna edo porrot egitea, pertsona fisikoaren kasuan.
- d) Nortasun juridikoak porrot egiten duenean edo hura likidatu edo desagertu egiten denean, Arrain Freskoaren Eroslea pertsona juridiko bat denean.
- e) Baldintza Orri hauetako 6. artikuluan adierazten den epea amaitzen denean.
- f) Baldintza Orri hauetan xedatzen diren baldintzak behin eta berriz betetzen ez direnean.

Artikulu honetan aipatzen diren baimena iraungitzeko arrazoiren bat gertatzen bada, Pasaia Portuko Agintaritzaren Zuzendaritzak interesatuari jakinarazi eta hamabost eguneko epea emango dio honek egokitzen jotzen dituen alegazio idatziak egin ditzan, baimena norberak nahi duelako edo epea amaitu delako iraungi den kasuetan izan ezik. Epe hori amaitzen denean, Administrazio Kontseiluak edo horretarako eskumena duen pertsonak baimena iraungi dela adierazi ahal izango du ebazpen arrazoitu bidez.

Baimena iraungi ostean, pertsona fisiko edo juridikoa Erregistroko inskripzioetik kanpo geratuko da.

Baimena iraungitzen denean, Portuko Agintaritzak ez du inolako erantzukizunik izango titularraren aurrean, eta ez du inolako ardurarik izango titularrak izan zitzakeen eta aldi baterako edo behin betiko etenda geratu diren ekonomia-, lan- eta kontratu-arloko betebeharrei edo bestelako betebeharrei dagokienez.

8. artikulua.- Harremanak Portuko Agintaritzarekin.

Arrain Freskoaren Erosleek Pasaia Portuko Agintaritzak finkatutako agiriak eta formatuak erabiliko dituzte harekin harremanetan jartzeko. Era berean, arrainaren salmenta hobeto antolatu eta kontrolatzearren, Portuko Agintaritzak agintzen dituen neurri guztiak hartu beharko dituzte.

9. artikulua.- Enpresako langileak.

Baimena eskatzen denean, Arrain Freskoaren Erosleak Portuko Agintaritzari jakinaraziko dio nor sartuko den portuko eremu mugatueta, Arrain Freskoaren Eroslearen jarduerarekin loturiko eragiketak bertan egitera, eremu horietan sartzeko baimenak eman diezazkieten.

10. artikulua.- Ingurumena babestu beharra

Ingurumenaren arloan indarrean den legeria betetzen dela bermatu beharko da, lonjan aritzeko baimena duen titularraren lan eta jarduerari eragin diezakeena, batik bat hondakin, isurketa, eta zarata eta partikulen igorpenari dagokionez; beraz, administrazio eskudunek agindutako baimenak eta lizentziak eskuratu beharko dira jarduera horiek gauzatu ahal izateko. Hori guztia zerbitzua eskaini ahal izateko eta horiek indarrean mantenduz.

Horretarako, IP-VIG-001 Prebentzio Orokorrerako Jarraibidearen 5. atalean xedaturikoa ere bete beharko da, 2011ko otsailaren 23ko GAOn argitaratua eta I. Eranskin gisa erantsia: "Zerbitzuko portu-eremuko sarrera, bide eta jabari publiko komunean sartzeari, zirkulatzeari, egoteari eta prebentzioko neurri eta arrisku orokorreari buruzko informazioa".

11. artikulua.- Arau-hausteak eta zigorrak.

Arau hauek betetzen ez direnean, Portuko Agintaritzak dagozkion zigorrak ezarriko ditu Estatuko Portu eta Merkataritza Nabigazioari buruzko Legea, haren xedapen osagarriak eta Portuko Zerbitzuen eta Poliziaren Araudi Orokorra eta haren Portuko Ordenantzak kontuan hartuta, izan ditzakeen erantzukizun zibil eta penalez gain.

12. artikulua.- Baldintza Orri hauen aplikazioa eta interpretazioa.

Portuko Agintaritzako Zuzendariak eta horretarako eskumena duen pertsonak, izaera orokorrean edo kasu partikular bakoitzean, beharrezko aginduak emango dituzte Baldintza Orri hauek betetzen direla bermatzeko, eta beharrezko interpretazioa egingo dute Portua behar bezala ustiatu dadin.

13. artikulua.- Erreklamazioak eta errekurtsioak.

Baldintza Orri hauen aplikazioari buruzko erreklamazioak Portuko Agintaritzaren Administrazio Kontseiluak ebatziko ditu eta ebazpen horiek amaitutzat emango dute administrazio-bidea; dena den, errekurtsua aurkeztu ahal izango da, administrazioarekiko auzi-bidez, dagokion Justizia Auzitegi Nagusian. Tasei buruzko erreklamazioei dagokienez, ekonomia-administrazio bidetik aurkeztu ahal izango da errekurtsua.

Aldi Baterako Xedapena.

Baldintza Orri hauek indarrean sartzen direnean beren zerbitzuak eskaintzen dituzten Arrain Freskoaren Erosleek Orri hauetan zehazten diren xedapenetara egokitu beharko dute horiek argitaratu eta hiru hilabeteko epean, eta dagokien baimena eskatu beharko dute.

Ez badira aipatutako epean egokitzen, Portuko Agintaritzak dagokion baimena ukatu ahal izango die eta Erregistroan inskribatu gabe utzi ahal izango ditu; horrenbestez, ezin izango dituzte beren jarduerak gauzatu portu-eremuan.